



16. september 2009

Inatsisartut suleriaasianni § 36 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit: Nunatsinni innuttaasut 18-it inorlugit ukiullit pujortartartut kisitsisinnorlugit ilisimaneqarpat?

Taamaattoqarsimangippat Naalakkersuisut pilersaaruteqarnerlutik 18-it inorlugit ukiullit pujortartartut qanoq amerlatiginersut paasiniarnissaannut?

Ilanngullugu paaserusuppara pujortartartut ikiliartornerannut cigaritsinut tupanullu akitsuutit qaffakkiartornerat imaluunniit peqqinnarnerusumik inuuneqarnissaq pissutaanersoq?

Cigaritsit tupallu puuini naviasaarutininik allassimasartut saniatigut assinik naleqquttunik assitaliisinnaalernissaq pillugu Naalakkersuisut qanoq isumaqarpat?

(Inatsisartuni ilaasortaq Malik Berthelsen, Siumut)

Tunngavilersuut:

Nalunngilarput Nunatsinni cigaritsinik tupanillu pisiniaraanni 18-nik ukioqalereersimasariaqartoq. Taamaakkaluartoq ulluinnarni takornartaanngilaq sumi tamaani inuusuttuaqqat 18-it inorlugit ukiullit pujortartut - allaat meeqqat atuarfiisa timersortarfiillu silataanni takussallutik. Misissuisarnerimmi takutippaat inuusuttut 13 – 14-nik, ikinnerusunilluunniit ukioqarlutik pujortartarlutik aallartikkajuttartut. Taamaattoqarnera angajoqqaatut Inatsisartunilu Ilaasortatut soorunami eqqarsarnartoqarpoq.

Taamaattumik naalakkersuineramik suliaqartuulluni uppernarsaatissalimmik paaserusunnartorujussuuvoq, pujortartarneq inuusuttuaqqat akornanni qanoq annertutigisoq paasissallugu.

Nunatsinnimi naatsorsueqqissaartarfiup paasissutissiinera malillugu cigaritsit tupallu nunatsinnut eqqunneqartartut kisimik naatsorsorneqartartut oqaatigineqarpoq.

Soorunami nuannerpoq Nunatsinni pujortartartut ikiliartornerat minnerunngitsumillu politikerinik tamanik peqataaffigineqartumik tupatortarnerup akiorniarneqarnera takusinnaallugu.

Kisianni isumaga malillugu suli annertuallaamik atorneqarpoq. Takuinnarsinnaavagummi inuit katerisimaarfigisartagaanni soorlu bingortarfiit, inuusuttut ornittagaasa, inissiarsuillu silataanni cigaritsit kimmivikui qanoq takussaatisut.

Taamaattumik isumaqarpunga cigaritsit tupallu puuini ”tupa peqqissutsimut akornutaalluinnarpoq”-mik allassimasup saniatigut allamik eqqarsalersitsinnaasumik ilanngussisariaqartugut.

Eqqarsaatiga tassaavoq cigaritsit tupallu puuinni assinik, tupatortarnerup kingunerisaanik inuup pisataanik allannguisarneranik ersersitsisunik assitalersorneqartalernissaat. Aatsaallu taamaattunik assitalerneqarsimagunik Nunatsinnut eqqunneqartalissasut. Assitaliunneqarsinnaasut tassaasinnaapput tupatortarnerup kingunerisaanik puuat, kigutit allallu qanoq isikkoqalertarnerisut.

Taamaasiornitsigut isumaqarpunga inuusuttuaqqat suli pujortalersimangitsut pujortalernissaannut pakkersimaarsinnaagigut. Aammami angajoqqaat inersimasullu pujortartartut qitornaminnik pujortaqqusinnigitsut ulluinnarni eqqarsaatigineq ajugaannik eqqarsalersissinnaagatsigit.



SIUMUT

INATSISARTUNI ILAASORTAAQ / LANDSTINGSMEDLEM